

**Aalisarnermut aningaasaliissutinut immikkoortitat pillugit Inatsisartut inatsisaata
allanngortinneqarnissaanut siunnersuut**

(Tapiisarnermut tunngavissanut allanngortitsineq)

Saqqummiussisoq Aalisarnermut, Piniarnermut Nunalerinermullu Naalakkersuisoq

pillugu

Aalisarnermut, Piniarnermut Nunalerinermullu ataatsimiititaliap isumaliutissiissutaa.

Siunnersuutip aappassaaneerpeqarnerani saqqummiunneqartoq.

Aalisarnermut, Piniarnermut Nunalerinermullu ataatsimiititaliap suliarinninnerani ilaasortatuku ilaapput:

Inatsisartunut ilaasortaq Aqquuaq B. Egede, Inuit Ataqtigiit, Siulittaasoq

Inatsisartunut ilaasortaq Niels Thomsen, Demokraatit, Siulittaasup tullia

Inatsisartunut ilaasortaq Juliane Henningsen, Inuit Ataqtigiit

Inatsisartunut ilaasortaq Hans Aronsen, Inuit Ataqtigiit

Inatsisartunut ilaasortaq Karl Lyberth, Siumut

Inatsisartunut ilaasortaq Hans Enoksen, Siumut

Inatsisartunut ilaasortaq Finn Karlsen, Siumut

UKA 2011-mi ulloq 28. september 2011 siullermeerereernerup kingorna Ataatsimiititaliap siunnersuut misissorpaa.

Siunnersuutip imaa aamina siunertaa

Siunnersuutip saqqummiunneqartup siunertaraa isaterinermut tapiissutip angallatip sillimaserneqarnerata nalingata maanna atuuttup 75%-iniit 100%-inut qaffanneratigut isaterinermut tapiissutinik qinnuteqarnermut soqutiginninnerup annertusarnissaa. Angallatip sillimaserneqarsimanngitsut arlaannaannulluunniit attuumassuteqanngitsumiit Aalisarnermut, Piniarnermut Nunalerinermullu Naalakkersuisoqarfimmiit toqqarneqartumiit, nalilerneqarsinnaalernissaat taamatutaaq periarfissaalissaaq.

Isaterisarnernut tapiisarnerni ataatsimiititaliap ilaasortaannut aalisartut nassuiaasimapput isaterinissamut tapiissutip appasippallaarnera pissutigalugu qinnuteqaateqartarsimanatik. Tamatumunnga peqqutaapput angallatip sillimmaserneqarnerani amerlasuutigut nalikipallaarnera, imaluunniit angallatip sillimmaserneqarsimannginnera. Tamassumallu kingunerisimavaa angallatinik isaterisarnernit malittarisassat atuuttut atuutilerneraniilli ikippallaarsimaneri.

Inatsisissatut siunnersuummi nalinginnaasumik naasuaatini paasissutissiissutigineqarpoq isaterinermut tapiisarnerni ataatsimiititaliap isumaqatigiittup allanguutit saqqummiunneqartut isumaqatigigai.

Inatsisissatut siunnersuutit saqqummiunneqartup makku allanguutit kingunerai:

1. § 15, imm. 2 imatut oqaasertaqartinneqassaaq:

"Stk. 2. Isaterinissamut tapiissutit annerpaamik sillimmasiinerup nalingata 100 %-iata nalinganut annertussuseqarsinnaapput, piniutit ilanngunnagit."

2. § 15-mi imm. 3 nutaatut ikkuunneqassaaq:

"Imm.3. Angallat sillimmaserneqarsimanngippat, angallatip nalinga naliliisartumit arlaannaannulluunniit attuumassuteqanngitsumiit, Aalisarnermut, Piniarnermut Nunalerinermullu Naalackersuisoqarfimmiit toqqarneqartumiit, aalajangerneqarsinnaavoq. Qinnuteqartup angallatip nalilernerneqarnerani aningaasartuutit akilissavai."

Tamatuma kingorna imm. 3 imm. 4-ngorpoq.

Inatsisartut inatsisaat atuutilissaaq 1. januar 2012.

Tusarniaaneq.

Siunnersuut ulloq 17. maj 2011-imiit ulloq 27. juni 2011-imut ukununnga tusarniaassutigineqarpoq: KANUKOKA-mut, Sulinermik Inuussutissarsiuqartut Kattuffiannut (SIK), Sulisitsisut peqatigiiffiannut, NUSUKA-mut, KNAPK-mut, Inuussutissarsiornermut Suliffeqarnermullu Naalackersuisoqarfimmut, Ilaqutariinnermut Naalackersuisoqarfimmut, Peqqissutsimut Naalackersuisoqarfimmut, Nunamut Namminermut, Pinngortitamut Avatangiisinullu Naalackersuisoqarfimmut aammalu Aatsitassanut ikummatissanullu Pisortaqarfimmut tusarniutigineqarpoq.

Naalackersuisoqarfiup makkuninnga tusarniaanermut akissutinik tigusaqarsimavoq: SIK, Inuussutissarsiornermut Suliffeqarnermullu Naalackersuisoqarfik aamma Nunamut Namminermut, Pinngortitamut Avatangiisinullu Naalackersuisoqarfik.

Inuussutissarsiornermut Suliffeqarnermullu Naalackersuisoqarfik nassiunneqartunut oqaaseqaateqanngilaq.

Nunamut Namminermut, Pinngortitamut Avatangiisinullu Naalackersuisoqarfiup taamaallaat siunnersuutip oqaaseqaatitaanut oqaaseqaateqarput. Oqaaseqaatigineqartut siunnersuummut ilanngunneqarput. Oqaaseqaatigineqartut "Pisortanut tunngatillugu aningaasaqarnikkut aqutsinikkullu kingunissai" aamma "Avatangiisinut pinngortitamullu kingunissai" tunngassuteqarput.

SIK oqaaseqaateqanngilaq, siunnersuummik tapersersuinerat eqqaassanngikkaanni.

Tamatuma kingornatigut 30. september 2011 allakkatigut KNAPK ilaatigut kissaateqarpoq pissutsit Ataatsimiititaliami ilaasortanit maluginiarneqassasut, aalisartut nutaanngitsunik angallataatillit angallataatiminnik nutartererusukkaluartut periarfissaq atorusullugu paasiniaagaangamik, paasisaraat aalisarsinnaanerminnut licens ilanngullugu annaassallugu, taamaasillutillu aserorteriniarnertik unitsittarlugu.

Siunnersuutip Ataatsimiititaliamit suliarineqarnera.

Sinerissap qanittuani aalisarnermi pissutsit tunngavigalugit inatsisissatut siunnersuut Ataatsimiititaliamit ajunngitsutut isigineqarpoq. Sinerissap qanittuani angallatit akornanni ullutsinnut naleqqutinngitsunik suli angallateqarpoq, taamaattumillu inuttaasut akissarsiaqartissinnaanissaannut peqatigitillugulu angallatip naammaginartumik pitsaassuseqarnissaanut angallataatillit naammattumik matussusiinissamut naammattumik isertitaqartarnersut qularnarluni. Umiatsiat nutaannginnerit aamma amerlanertigut sillimaniarnerup, motorip atorsinnaassusaagut, atorluarsinnaaneratigut inaaliiveqarnikkullu pisoqalisimaqaat.

Isaterinissamut tapiissutinik qinnuteqarnissamut angallatit periarfissallit amerlassusaat pillugit 2009-p naajartornerani takussutissiaq.

Angissutsit	Angallatit	Agguaqatigiissillugu pisoqaassusiat
05 < 10 BRT	31	36
10 < 20 BRT	47	42
20 < 50 BRT	4	41
50 ≤ 75 BRT	4	39
Katillugit	86	

Angissutsit	Angallatit	Agguaqatigiissillugu pisoqaassusiat
08 < 10 BT	5	32

10 < 20 BT	1	25
20 < 75 BT	5	46
75 ≤ 120 BT	2	35
Katillugit	13	

Ataatsimiititaliaq isumaqarpoq aalisariutit pisariaqartumik nutarteriffigineqarnerannut aaqqissuussaanerisalu naleqqussarneranut inatsisissatut siunnersuut ilapittuutaasinnaasoq, taamaaliornikkut isumalluutit atorluarnerunerisigut aalisarnerup pitsaanagerusumik unammillersinnaasup aalisartunut inuiaqatigiinnullu iluaqutaanerusup pilersinneqarnissaanut periarfissaq ammaanqassaaq, taamaalillunilu naggataagut aalisarnermik inuussutissarsiut aningaasarsiornikkut imminut napatittoq ataavartumillu imminut pisariaqartutigit naleqqussarsinnaasoq pilersinneqassalluni.

Angallatip sillimaserneqanngitsup nalingata naliliisartumit arlaannaannulluunniit atuumassuteqanngitsumit nalilerneqarsinnaanera pillugu aamma qinnuteqartup angallatip nalilerneqarnerani aningaasartuutit akilissagai pillugit aalajangersagaq isaterinissamut tapiissuteqartarneq pillugu maanna allassimasumi kaajallaasitakkut pioreersumit inatsisitigut aalajangersagaavoq. Naliliinermut atatillugu qinnuteqartoq aningaasartuutunik nammineq akiliisassasoq naleqquttuusoq Ataatsimiititaliaq isumaqarpoq. Ilaatigut angallataatillip angallammik sillimmasiisimanngitsup taamaalillunilu naliliisitsisimanngitsup sillimmasiinermi akiliut sipaarsimassavaa, ilaatigullu isaterinissamut tapiissuteqarnissamik qinnuteqarnissamut isumaliuteqarnermini qinnuteqartup akissaajaat nammineq ilanngussinnaavaa.

Ataatsimiititaliaq Naalakkersuisunut kaammattuivoq, maleruagassat allanngortinneqassasut, taamaalillutik aalisartut angallammik nutaanngitsumik isaterinissamut tapiissutinik qinnuteqarsimasut immaqalu aalisartut allat peqatigalugit umiatsiamik nutaamik pissarsinissamik kissaateqartut akuersissutertik pigiinnarsinnaassavaat.

Siunnersuutip aningaasaqarnikkut kingunerisassai.


Siunnersuutip kingunerisussaangilaa aningaasaliissutit ilassutissaanik akuersissutiginnittoqassasoq. Pissusiviusutigit ersernikuuvoq missingersuutitut naatsorneqartunut sillimmasiinerup nalinga angallatip nalinginnaasumik niuerutigineqarnerata nalingata missaaniittoq. Angallatit annikippallaamik sillimaserneqartarsimanerisa kingunerissavaa tapiissutaasinnaasut ikinnerunissaat. Allannguutissatut siunnersuutip qulakkiissavaa aningaasaliissutaasut pilersaarutigineqartutut atornerarnerulernissaat.


Ataatsimiititaliap inassutai.


Ataatsimiititaliaq isumaqatigiittoq inatsisissatut siunnersuutip saqqummiunneqartup Inatsisartunit aappassaaneerneqarnerani akuerineqassasoq **inassuteqarpoq.**

Taamaattorli Ataatsimiititaliap isumaqatigiittup peqatigitillugu Naalakkersuisut **kaammattorpai** pingajusaaneerinninnermi allannguutissatut siunnersuummik saqqummiussissasut, taamaalillutik aalisartut angallammik nutaanngitsumik isaterinissamut tapiissutinik qinnuteqarsimasut immaqalu aalisartut allat peqatigalugit umiatsiamik nutamik pissarsinissamik kissaateqartut akuersissutertik piginnarsinnaassallugu.


Taamatut oqaaseqarluni isumaliutissiissummilu allassimasutut paasinnilluni Ataatsimiititaliap siunnersuut aappassaaniigassanngortippaa.


Aqaluaq B. Egede
Siulittaasoq


Niels Thomsen
Siulittaasup tullia


Hans Aronsen


Juliane Henningsen


Karl Lyberth


Finn Karlsen


Hans Enoksen